


01 novambra 2017

Fankalazana ireo olomasina



Ry Kristianina havana, tamin'ny Alahady lasa teo, faha 30 mandavataona no namaranantsika ny volan'ny raozery izay nibanjinantsika ny misterin'ny famonjena antsika : misterin'ny fahatongavana ho nofo, misterin'ny famirapiratan'ny fahazavana, misterin'ny fijaliana izay nibanjinantsika an'i Jesoa manolotra ny ainy ho fanavotana antsika ary ny mystery be voninahitra izay hibanjinantsika miaraka amin'i Masina Maria ny fiainan-koavy izay andrasantsika. Androany izay mampiditra antsika amin'ny volana novambra ka hatsarovantsika ireo nialoha làlana antsika indrindra mampahatsiaro antsika fa

Vakiteny I : Apôk. 7, 2-4. 9-14

Tononkira : Salamo 23

Vakiteny II : 1 Jo. 3, 1-3

Evanjely : Mt. 5, 1-12a

any an-danitra no tena fiainana. Ny fahafatesana sanatria tsy fiafarana na fahalevonana, tsy hoe levona mandrakizay isika, na i Kristy aza dia nandalo fahafatesana ary nandresy an'izany. I Masina Maria koa toy izany ary nampakarina vatana sy fanahy any an-danitra. Noharian'Andriamanitra misy fetra isika

olombelona. Andriamanitra irery no tsy misy fetra, fitiavana Andriamanitra ka tiany isika hitovy endrika Aminy izany no nahariany antsika ka raha nandahatra an'izao tontolo izao sy nahary antsika olombelona Andriamanitra dia nohariany ho ao aminy ka olona araiky ao aminy tokoa isika fa isika olombelona no be siasia.

Izao voalohan'ny volana novambra izao dia hahatsiarovantsika ilay Jerosalema any an-danitra izay mampahatsiaro fa any no voaantso isika raha miombona amin'Andriamanitra, raha mivelona ny maha Kristianina isika ka Kristy mpiara-belona amin'olona isika, ny vocation ntsika dia ho any

amin'izay misy an'i Kristy ao amin'Andriamanitra ka ity tany ity dia tany ho entintsika miomana amin'ny fiainana lavorary izay iombonantsika amin'Andriamanitra dia ny hasambarana mandrakizay.

Ry Kristianina havana, mankalaza isika androany fetin'ny olomasina rehetra, olomasina izy ireo satria niombona amin'Andriamanitra, ary izay fiombonana izay averimberintsika matetika fa ny fahamasinana tsy hoe ireo voatsangana olomasina ihany fa ireo rehetra niombona hasambarana amin'Andriamanitra any an-danitra izay mampiombona antsika amin'ny Trinite masina.

Izany no antitranterin'ireo vakiteny atolotry ny eglizy androany na ny bokin'ny fanambarana amin'ny vakiteny voalohany izay anehoan'i Md Joany fa nahita famantarana izy ka ireo izay nanadio ny akanjony, izany hoe ireo izay niezaka namolaka ny tenany, nampiray ny tenany amin'Andriamanitra, ilay fahotana tsy miala amintsika dia nodiovin'Andriamanitra miaraka aminy fahasoavany ka miombona aminy rehefa madio. Masina miaraka aminy isika tsy noho ny fahamendrentsika fa noho ny fahasoavana nentin'i Kristy, noho ny ran'ny zanak'ondry dia i Kristy izay nanolotra ny ainy ka manome antsika ny ainy. Raha mandray ny ainy isika dia madio ary isika mizara izay aina izay amin'ireo manodidina antsika mba ho tena generation manorina, manavao, mandavorary isika.

Mbola manamafy izany ny vakiteny faharoa ho antsika *"Ry hava-malala, zanak'Andriamanitra isika ankehitriny, nefa mbola tsy naseho izay ho tena toetrantsika; fa amin'ny andro hampisehoana izany, dia fantatsika fa hanahaka Azy isika, satria hahita Azy araka ny tena toetrany. Izay rehetra manana izany fanantenana izany ao aminy dia manadio ny tenany mba ho madio tahaka Azy."*

Mampatsiahy antsika ny toetra mahazanak'andriamanitra izany, fototry ny fahamasinana dia ny batemy, iainantsika tokoa ny batemy fa tsy hoe milaza fotsiny vita batemy aho, raha tena miaina an'izany isika dia miombona amin'i Kristy dieny ety an-tany ka hatramin'ny fiainana mandrakizay. Izany no ampianarin'i Md Joany amintsika amin'io vakiteny faharoa io. Manambara koa izy fa tsy mijanona fotsiny amin'ny famaritana maha zanaka isika fa ny fanahafana an'i Kristy, kristianina dia i Kristy mpiara-belona amin'olona no hazahoanantsika tanteraka ny fiombonana amin'i Kristy.

Ny evanjely nosoratan'i Md Matio amin'izao alahady faha 30 mandavataona izao dia mampianatra antsika fa ny fanahafana an'i Kristy amin'ny fahasambarana valo izay ampianariny antsika io no tena hasambarana. Tsy hoe fananana harena ny hasambarana, izany manko ny hevitr'izao tontolo izao rehefa hoe manana an'izao aho dia ho sambatra. Tsy izany ny fahasambarana fa ny toetranao manahaka an'i Kristy izany hoe ireo toetra valo nananan'i Kristy ary tsy hoe nanao kobaka am-bava izy fa toetra tena nananany sy niainany ireo fahasambarana valo ireo.

Raha ny marimarina kokoa dia sivy fa ny fahasivy mamintina izany hasambarana valo izany satria izao tontolo izao tsy manaiky ka manilikilika, izany no mahatonga an'i Jesoa miteny hoe : *"Sambatra ianareo raha tevatevaina sy enjehina ary ampangaina lainga amin'ny ratsy rehetra noho ny amiko"*

Io ny "critère" hahafantarana fa manahaka an'i Kristy isika raha enjehina satria izao tontolo izao tsy manaiky an'io toetra io izay hanahafantsika an'i Kristy dia ilay lazain'i Kristy hoe :

"Sambatra ny mahantra am-panahy fa azy ny fanjakan'ny lanitra"

Raha mireharaha amin'ny fananana izay tsy voatery ho vola aman-karena fa ny toetrantsika, io no tsy maintsy hofolahina mba hanana an'izay fahantrana sy fahalemem-panahy izany hoe

miandrandra mandrakariva ny tena toetra maha zanak'Andriamanitra mba ho fenoin'Andriamanitra ny fo amam-panahy ka izany ny fanjakan'ny lanitra ho antsika.

"Sambatra ny malemy fanahy fa izy no handova ny tany", izay nohalalinintsika tamin'ny JMJ, io no làlana hanavaozantsika ity tany ity mba ho tranoben'Andriamanitra raha samy malemy fanahy isika ka generation mpanorina, mpanatsara, mpandavorary fa tsy mpanapotika.

"Sambatra izay mitomany fa alana alahelo izy", Andriamanitra no hanala alahelo antsika izany hoe ny fampianaran'i Kristy no manampy antsika, maro ny fananarana azontsika amin'ny alalan'ny fampianarany. Mankahery antsika ho afaka hiatrika ny fiainana

"Sambatra izay noana sy mangetaheta ny fahamarinana fa ho voky izy", ny fahantrana mikiky ny firenentsika satria tsy manjaka ny marina eto amintsika, tsy manjaka ny rariny sy ny hitsiny. Raha tiantsika ho marina ny fiainantsika dia aoka isika hanahaka an'i Kristy satria ny marina no maha olona afaka antsika, izany no tena fahendrena dia ny fahendren'i Kristy.

"Sambatra izay ny mamindra fa hamindrana fo izy", nohalalinintsika io tamin'ny taonan'ny famindrampo, toetra manambara fa Kristy mpiara-belona amin'olona tokoa isika raha manatanteraka ireo asa famindrampo eo amin'ny fiainantsika na ara-panahy na ara-nofo na ara-tsaina, eo koa ny fikolokoloana ny tontolo iainantsika izay no manambara fa mamindra fo tokoa isika . Io toetra mamindra fo mampibaribary fa tena Taranaka Génération Mpanorina isika fa tsy mpandrafa

Ary hahita an'Andriamanitra isika raha madio fo araka ny voalazan'i Jesoa hoe : "sambatra ny madio fo fa hahita an'Andriamanitra" . Ireo olona masina ankalazaintsika dia tena nadio ny akanjony, ny ankanjo dia ny fontsika voadio ary i Masina Maria no modely ho antsika amin'izany.

"Sambatra ny tia fihavanana fa antsoina zanak'Andriamanitra", io toetran'i Kristy io no andrandraintsika, izy nanolotra ny tenany. Tsy misaraka ny Mpamindra fo sy ny tia fihavanana. Antsoina zanak'Andriamanitra ny tia fihavanana. Maniry fihavanana isika ka raha tiantsika ho ho tanterka eto amintsika izany dia aoka "hanahaka an'i Jesoa". Manana modely isika, faniriana moa ny antsika ary irintsika ho tanteraka amin'ny 15 aprily izao ny fananganana olon-tsambatra an'i Lucien Botovasoa izay modely ho antsika koa. Rabefihavanana no niantsoana azy noho izy miezaka hadio fo sy hampihavana tamin'ny fiainany. Enga anie isika haka tahaka azy amin'ny fanarahan-dia an'i Kristy.

Marina fa mety manahirana izany rehetra izany fa efa nambaran'i Kristy fa izany no làlan'ny hasambarana. Na izy koa aza niaina sy nivelona an'izany ka modely manambara amintsika ny làlan-kombana izy, izay mitondra antsika any amin'ny fiainana mandrakizay izay hitoerantsika satria any no iantsoan'Andriamanitra antsika.

Ry Jesoa Kristy Tompo ô, ampio ary izahay hanamasina ny fiainanay ;

Enga anie izahay ho Kristy mpiara-belona tokoa eo amin'ny mpiara-belona aminay

Hivavaka izahay ho any olombelona rehetra fa indrindra ny mpitondra mba hanamasina ny tena sy ny tany ionenany ity tranobe iombonanay ity

Araka ny toriteny nataonao teny an-tendrombohitra,
enga anie ny fiainanay hanahaka ny fiainanao.

Ireo hasambarana valo mba ho toetranay tokoa ka amin'izay ny iainanay eto mba hiainanay koa any
amin'ny fiainana mandrakizay hahazoanay ny hasambarana tena izy sy hafaliana tena lavorary
miaraka amin'ireo olomasina rehetra izay hivavaka ho anay koa amin'ny ezaka rehetra ataonay.
Amen

Mompera Arseveka Mgr Benjamin Ramaroson